

獨

醒

子

獨醒子下

錫山賈應璧文宿甫著

甥張明時甫校

獨醒子歸隱林皋之西築室九龍之麓客至則
談道以爲樂客去則展卷自怡時和景明則
徜徉泉石風雨晦暝則閉戶不出庭無雜塵
身有餘閒一切是非毀譽置之罔聞晏如也
適有盡性立命二生過而晤語面有憂色獨
醒子曰二子何色之不豫也二生同聲相應

曰吾聞君子無所爭何今之時舉世皆好爭也爭名者於朝爭利者於市吾無論矣然有無所為而空言是競者吾竟莫知其由今吾奉先生之教樂先生之道謙已下人尊賢容衆無須臾敢離有年矣而不免於有爭之患是以有憂也獨醒子曰何哉二生所患者豈嘗有所警乎盡性生曰北郭豪好勇而不循禮通國皆知其妄也生平無所與忤倏然相遭於途突兩相觸即穢言相加俛首相讓威

猶未霽賴一二旁觀者微言相解而去斯須
不忍將奮臂相搏矣忍之心切有所不甘獨
醒子曰子名盡性其知養性之道乎至人之
養性也貌而天虛緣而葆真清而容物無
道正容以悟之使人之意也消斯人也知其
妄吾將至誠以感動之是何足患哉立命生
曰小嫌容或可忍也猶有大於是者其何能
忍東野徂草萊藏身禱杙成性世濟免殘盤
據一方舊矣鄉黨中其毒者咸側足不敢出

息然其智足以飾詐其財足以通神官司莫
之隨何將謂天奪之魄而猶未厭亂雛類日
繁乃有身被襟裾貌似近人而人不可近小
有睚眦便思一逞晝則掠人於市暴虐橫施
夜則呼朋羣飲謀不及義有不當意者輒聚
衆而圍辱之怒心不快不止也嗤彼醜類惡
與性成莫之或責衆嗜狂藥與之俱化羣然
吠聲尤可深耻吾將逆受而順承彼則有加
而無已此其無道之極不報人情大有所不

堪者其何以忍哉獨醒子曰人有可以理喻者微言得以解紛有可以德化者至誠得以感動斯人也不可理喻不可德化付之無心焉爾昔有端士至狂國者舉國之人皆狂衣冠言動罔不違其常度視茲步中繩言中矩譁然以為恠反目不狂者為狂咸欲束縛而灸藥之端士大駭莫可抵止遂變其舉措佯狂而避狂人意阻乃得脫故蛇之齧鵠之螫其性然也孰能變其性使不齧不螫哉人不

幸卒然而遇蛇蝎亦歸之命焉爾子不見孔
子乎孔子適於匡匡人疑似陽虎帶甲圍之
子路怒奮戟將下孔子止之曰由何不知命
也夫水行不避蛟龍者漁父之勇也陸行不
避兇虎者獵夫之勇也白刃交於前視死若
生者烈士之勇也知窮之有命臨大難而不
懼者聖人之勇也吾非陽虎而適遭其難非
吾之罪也吾命有所制矣相與絃歌而不輟
匡人知其非陽虎也圍遂解夫使孔子而不

免也亦安於命焉爾子能知命則斯人也目之爲蛇已耳目之爲蜴已耳於蛇蜴又奚較焉二生憮然曰天下事有出於常理之外者聖人且無如之何今而後吾盡吾性吾安吾命吾知所以息爭矣

天道好善而惡惡則其生物也宜乎善者多而惡者少矣今天下飛者吾知其爲鳥鷹鸛多而鳳凰少豈鳳凰惡而鷹鸛善乎走者吾知其爲獸虎豹多而麒麟少豈麒麟惡而虎豹

善乎植者吾知其為木荆棘多而芝蘭少豈
芝蘭惡而荆棘善乎具五形而靈萬物者吾
知其為人強暴多而仁義少豈仁義惡而強
暴善乎將人之所謂惡者天以為善乎人之
所謂善者天以為惡乎抑善者可欺惡者可
畏天亦不能制其命乎自古至今亂日常多
而治日常少君子與小人爭小人之勝常多
君子之勝常少何天道之好善惡惡若是其
戾乎嗟乎氣化雜揉清濁易淆善類難培惡

種不毓而自生彼蒼黔邇亦無如之何爾雖
然置鷹鸇虎豹於山林而麟鳳見於清明之
朝委荆棘於曠野而芝蘭植於善人之室處
強暴以桎梏而仁義寵之以爵祿是善雖少
而天人攸好惡雖多而天人共惡天意人心
未嘗不昭合也孰謂天道之無定命耶

善惡果有報乎抑無報乎謂善者必獲福而惡
者必獲禍耶何世之飭躬勵行者多窮約以
終身而肆行克暴嗜人無厭者日享安富之

樂以故回之夭憲之貧距之壽崇之富皆天道之無定衡者也豈禍福有僭差耶謂善者不必福而惡者不必禍耶何文正手植三槐而後世之有三公若取諸寄崔浩恃才專權而身戮族滅禍不旋踵則作善降祥作惡降殃之說又若是乎不虛矣噫天道難謐鬼神雖渺勿以善無福而不為勿以惡無禍而為之君子脩身俟命道其常而已陸務觀曰為善自是士人常事乃規身後福報吾輩之

使無禍福報應可為不善耶

佛教興於輓近而錫風尤甚喻義子素好山居
性不嗜佛而身近梵宇不厭隨喜時見愚夫
愚婦往來焚脩叅禮虛皇者踵接肩摩殆無
虛日竊聽其叅禮之詞必長跪叩禱曰壽命
綿遠子孫隆昌六畜繁育田禾備償出入生
理利益相將凡可以致富貴享安樂者罔不
盡言以祝之子聞而笑曰爐烟陌帑費曾幾
何祈禱萬千咸求如願何其挾持者小而責

報者大也噫世情貪得無厭即焚脩時猶然
不忘好利神明且奈之何哉

喻義子不解談禪時一閱內典見內典中有曰
不墮邪見不起愛憎不著諸相視諸物平等
等語未嘗不掩卷歎曰此與吾儒無欲故靜
萬物一體平情絜矩之道互相發明也今之
村夫野婦躬脩齋沐口誦阿彌惟冀福田利
益者其中憤、不知經典為何說吾無責焉
爾然有策名仕籍身履王庭背受儒業者往

往舍所學而崇信禪教焉一切梵語多所手
錄心維少有齟齬固不究解甚至入關叅定
謝絕人事自以為得禪家三昧佛道盡在是
矣及考其作為則心與口相違遠甚見功名
則嗜之如飴見貨利則趨之如市見樞要則
多方而締結之見貧賤則押侮而較轆之見
人之產則百計而謀奪之見人之得則陰損
而擠陷之見人之失則陽斥而譏訕之種々
邪見種々愛憎種々諸相人或未有未染染之

而未備者則仕人悉備染之矣好尚若此心
事若彼匪直儒者不爲即村夫野婦亦不爲
也佛果有知不當皺眉避三舍乎今之所謂
談禪談禪者如是而已談何容易

天下事不可強者甚多若有違質害將及之其
何益之有蘧篨不可強俛戚施不可強仰僂
僂不可強舉侏儒不可強援嚚瘖不可強言
聾瞶不可強聽僮昏不可強謀貧不可強富
賤不可強貴醜不可強美老不可強壯跛不

可強走弱不可強任飽不可強食醉不可強
酒痿不可強慾屈不可強伸諸不可強者順
其質之自然庸無害也甚至有強驕以為恭
強貪以為廉強詐以為直強淫以為潔強佞
以為忠強邪以為正強怒以為喜強暴以為
慈強怨以為好此尤致飾以欺人害國害民
之大者何可與之一朝居哉

世人論交無事懽然浹洽毫有不平便忿然作
惡不揣理之是非情之輕重遂謂讓相加不

已繼之穢詈若曰我能辱彼可洩胸中之忿
矣自有識者觀之此與舞劍驅風彎弓射日
者無異我縱勞神風日何損遇彼汪洋長者
恬然受之渙然水釋何其雅度也作惡者焦
心動氣將以辱人人無所損已先受累覩此
直當愧死矣

今人不能容物每受一言之挫便為彼能辱我
若撻轉市恩所以報復之雖云出爾反爾此
亦淺丈夫者之所為何足與語大人之度譬

之虛舟觸物飄瓦驚人、曷嘗有怒心一切橫逆應作是觀

江潯小民多以畜彘爲生柴荆籬落不甚鍵鑰夜有巨鼃入園竊啗彘食彘惡其妨已也驚叫不已適遇席經舍旁側聞彘聲不勝咆哮之狀一躍而進意圖搏彘詎謂席揣鼃頭鼃咬虎足兩物相持久則俱困不能脫去江民啓戶竊視一股就擒二物之利與彘孰多得失之介若或使之理固然也嗟、席不得彘

卷之二
七
鼃不得食已爾乃并二命喪於江民之手正所謂鰥蚌之利漁人取之奈何世之愚民爭利而亡身者往類是惟無意於利者得之噫安得忘利者與之談義命也

施予人情所有也得當則平失當則其害尤甚於無施故君子之用愛不在於好施而在於所施之得人施之得人則恩澤所被人之感之也必深非其人適以濟其淫而灾禍随之矣天下之窮難處而不易施者惟寵倖之輩

此輩嗜欲無厭而希望太過以太過之望而
冀塞其無厭之欲將從其欲而厚施之與則
見為當得而不為惠抑斬所與而薄施之耶
則見為鄙陋而益輕將數、而頻施之與則
見為尋常而怙恃抑遲、而緩施之耶則見
為吝出而寡恩將稱其事而平施之與則不
勝其矜能之態抑有所主而越施之耶則遂
起不平之爭求之而必欲得、之而不知止
不施則怨生施之則難繼裁之則不堪而逢

其怒發之則激變而禍起於蕭牆此皆施之
不得其人而積愛之過也昔宋萬宋之倖臣
也始爲宋公愛之甚而施之厚萬爲魯國公
之愛不如初萬病之遂弑宋公張貴人晉之
寵姬也孝武帝溺於色、勝則寵冠後庭施
予莫可比伍色衰將廢之姬怒乘帝醉臥潛
令其婢蒙之以被暴崩嗚呼幸如萬寵如張
受君之愛甚深也一旦愛弛而怨望生遂鼓
弑逆之禍此非施不得人之驗與故驕子多

不孝寵臣多不忠愛妻多不遜倖僕多不良
家國之事大抵同也君子既知其恩之當施
與不當施又知其人之可愛與不可愛當施
者不以怨憎而吝與不當施者不以私愛而
過情可愛者近之而不以為昵不可愛者遠
之而不以為踈不開寵倖之門自無納侮之
咎君子所以終身無灾禍者其用愛與人殊
也竇融有曰憂人太過以德取怨亦有見之
言夫

人生有欲而不遂則不能無求、而無度量則不能不爭、則亂、則窮先王惡其亂也故制禮以防之人有定分不相陵奪也乃世之為禮者多越於常制之外其何以遏欲哉奸人之巧為身謀者必先為人謀人謀行斯足以圖人之利而自利矣欲為人謀非言之近情事之近理者不足以取信於人信之何術必深思而熟計曰利人之所同欲也以利動人、其我信哉如曰某曰欲鬻土肥而佃殷

歲可獲租若干斛也某廬欲售近市而易儲
月可歛廛若干緡也某貨易殖朝積而夕湧
日可取贏若干鎰也辭之不已又為之計曰
某也良某也裕片言結會立可致金若干鍰
也取會金以置田廬營貨殖收田廬貨殖之
利以還會不數年致富如番掌矣茲非言近
情事近理者乎斯謀聽就謀者未獲什之九
作謀者先獲什之一一切駟僮奔走之費悉
充其私囊始焉垂橐而入既焉捆載而歸矣

此猶利害之小者庸若無傷詎意田有叅差
不必盡稔廬有損壞不必樂儲貨有消長不
必取贏即每歲所入不足以抵其所出結會
者紛紛踵門索擾不償不足以全信而償之
更無所取辦甚至復棄田廬與貨以求售又
不出作謀者之手輾轉反覆則昔之所積咸
為作謀者所得矣嗚呼聽其謀者日入其機
穀而不覺肆其謀者日縱其谿壑而無厭若
而人者奈何昕夕與處不惟不以為仇而反

以為忠斯亦可笑也夫斯亦可哀也夫
無生寔避役而走匿於山谷中貧無以治舍托
大樹而處焉日則拾其枯枝墮葉以為薪夜
則休息於樹下身若相安而食給不充心則
未饜也一旦遂斧其樹根枝悉拔束縛成肩
輿之於市天遊道人過而問之曰是樹曷去
哉無生寔告以故道人曰子真忍人也向汝
無廬而托以庇身也驕陽不為爍嚴霜不為
寒飄風不為撼晦雨不為侵伊誰之力耶子

當仰之若大厦親之若芝蘭雖昕夕愛護而
培養之猶懼其不蕃且殖也况忍戕伐之乎
吾聞魚之遊於川也惟恐水之涸鳥之棲於
林也惟恐木之疎予托樹為安而猶伐之真
魚鳥之不若矣噫今之人托身於人而反謀
其田廬者奚獨一無生寔哉

奸人之善於動人也固每以利啗人而人之為
其所動也畢竟貪心所使是利者奸之媒而
貪者奸之宅乎故舟必漏也而後水入焉衣

必垢也而後蠛生焉奸人之進也非因人之
貪則無以託其身貪夫之心一日不息則奸
人之謀一日肆行無忌彼豈真為人謀哉利
人實所以自利耳愚而不悟者明知其奸猶
然傾信而委用之不至於喪家敗業不已也
譬之腐肉致蠅、生蛆、復為蠅、蛆相生
而不窮必至於腐肉之盡而後已耳噫君子
知愚之為害也而求砭之如良醫之治病必
拔去病根然後奸邪無自而入焉苟知利之

為媒而貪之為宅也非屏其媒火其宅其何
以使奸之遠去哉

抱甕子將為圃召老圃而問曰吾欲治圃非堂
與無以駐晏息非臺榭無以供登眺非壘石
無以布奇巧非穿沼無以引水泉茲數者皆
人力所易攻吾既以命之矣有是數者而無
樹植以點綴之不足以觀美然植之地滋
之在天而培養之在人不可不慎所樹也厥
樹曷以老圃曰大者樹松筠次者樹果核下

者樹花卉其餘非僕所知也抑有說焉虬松
矯々飛舞若騰脩竹猗々琅玕鳴珮既交翠
而陰森復凌霄而挺節樹之美者莫先於此
棗栗充實而可食梨橘甘香而解渴材不迨
乎松筠而用則近之奇葩沃若異卉凝眸翫
之雖若可愛而終之易於傷折不逮果核之
有實用也明甚枳棘荆榛成而刺人又材之
宜下者樹之何益哉抱甕子歎曰樹之不可
不慎如此况於人乎蘊藉宏深挺然聳秀者

松筠之質也臨財不苟作事有成者果核之
材也聽之縻々察之無實者花卉之流也面
諛背毀易為短長者則荆棘矣君子之樹人
也可不慎與

抱甕子嘗為圃於惠麓之下見老圃之治圃也
沃其壤平其畦動其灌溉蔽其霜日疏其水
潦隨其物產之宜而施其藝植及其將成也
又刪其繁培其寡不違其時而俟其長養焉
以故竹木蔬果欣欣向榮手至成器無要著

也乃喟然曰吏之治民何異於治圃奈何旱
澇不知省賦歛不知度役使不知節其聊生
者無幾而入於官者恒倍焉無恠乎其民計
之日困也噫真老圃之不若矣

古今人勇怯何相遠哉碩作之者何如爾齊莊
公出獵有螳螂舉足將搏其輪莊公曰以為
人必為天下勇士矣於是迴車避之勇士聞
而歸之越王句踐伐吳道見鼃張腹而怒將
有戰爭之氣即為之軾曰吾思士卒之怒久

矣而未有稱吾意者於是軍士聞之莫不懷
心樂死人致其命彼二君者托物感人、即
為之効死力况真有恩澤以結其心鼓舞以
作其氣則人之奮勇又當何如方今南倭倡
厥北虜跣梁計邊疆者動徹以兵士單弱為
慮竟不思所部將領拊綏失策訓練乖方將
欲用之且先陷之非曰苦其役使以營私第
則日剋削其衣糧以充媚上之資能與士卒
同甘苦者幾何人哉如是求其不為我仇罕

矣兵何可得勇耶間有實心任事能恤下情者又以不能媚上而擯之噫上之人果能察其不勞民不剥下善拊綏善訓練遇敵能前不避險難者而信任之不責小過不督近效不以繁儀為殿宥如是而人有不奮勇也者吾弗信也

昔李悝為魏文侯上地守欲人之善射也乃下令曰人有疑訟不白者令射的中者勝不中者負令下人皆疾習射日夜不休及與秦人

戰大敗之以人之善射也今時有封疆之寄者平時不脩武備不訓練士卒有事束手無策徒歎曰無兵無兵何益之有果能以惛術教人習射其有弗善射者吾見亦罕矣

嘗讀漢史至武帝時渾邪王降漢有賈人與市坐法當死者五百餘人汲黯諫曰陛下不能得白奴之資以謝天下又以微文殺無知者五百餘人是所謂庇其葉而傷其枝者也上默然因思昔年緬酋數犯滇境督撫薦兵戡

亂不擇亡命無賴游手寄食之徒悉收用入
伍會予量移滇藩至則緬且平矣計餉不敷
時有散兵之議軍中聞言多涵：適有一編
裨所部募卒三百餘人潛亡未出境乃命材
官督兵追捕欲盡殺以徇衆事聞督撫督撫
曰可時予在坐曰方議散兵而復下追亡之
令是速亂也不若慰而遣之復使一將督之
出境毋擾地方毋爲民害則既去者得生還
未去者有歸路斯兩得之矣督撫猛省謝曰

非公言幾敗乃事遂繼之使去兵亦稍安此
事頗與漢武欲殺無知者相類故併書之以
為後之好殺者並觀云 時與劉鳳坪語
百里奚始為人牧牛而肥秦穆公見而問之曰
牛何以肥也對曰臣飲食之以時使之不以
暴有險先後之以身是以肥也穆公知其君
子卒相之卜式初以牧羊致富輸其家半助
邊漢武帝令牧羊上林中歲餘羊悉肥上過
而善之式曰非獨羊治民亦猶是也以時起

居惡者輒斥去毋令敗羣上以為奇拜絃氏
令絃民便之夫奚之相秦有道能顯其君以
霸天下其才固足多矣式在漢庭碌碌無奇
節獨以一言有契於先哲遂見奇於上令之
士大夫有語及式者多羞其所為然考其治
民有如式之牧羊者幾人孟子曰今有受人
之牛羊而為之牧者則必為之求粟與芻矣
求粟與芻而不得則反諸其人乎抑亦立而
俟其死與嗚呼今之牧民者豈惟不知求粟

與芻將并其粟與芻而竊之斯民奈之何其
不重厄也司牧者可以省矣

人之施恩者不可望報受恩者不可忘報昔管
仲自魯之齊路飢而泣過綺邑乞食封人跪
飧之因竊謂仲曰若用齊將何報我仲曰如
子之言我知有任賢使能而已何以報子封
人怨之韓信為布衣時嘗乏食釣於城下有
漂母見信飢飯信信喜謂漂母曰吾必有以
重報母母怒曰大丈夫不能自食吾哀王孫

而進食豈望報乎信後為楚王召母賜千金
噫封人一飯而有德色固失之陋仲父得食
而無所用情則失之忍惟不望報如漂母不
忘報如淮陰斯兩得之矣然則處人已之間
者尚其審諸

天道渺茫人心易欺無惑乎人之多詐也豈知
天人一理機自有不容掩者乎人有所為無
問巨細必順乎天理者斯能當乎人心一言
一動終無悔吝之憂即飲食夢寐可以舒眉

下咽安枕而卧矣故孟子以仰不愧天俯不
忤人為三樂之一有以哉昔趙清獻公曰吾
晝之所為夜必焚香以告天不敢告者不敢
為也司馬溫公曰吾平生所為無不可與對
人言者二公心事真如青天白日可以告天
自可以對人言能對人言自無不可告天者
俯仰何愧忤焉今人作事其敗常亂俗欺天
罔人之甚者固不足道即有微言細行人或
問及亦必曲為掩護巧為飾詞以告人且以

人受我欺人不我知深自以為得計而私心
竊喜不知欺人即欺乎天况真情久終當
自露有不可掩飾者人雖不我責我將媿死
無地乎噫天人之際誠可畏哉

韓家奴善炒栗曰小者熟則大者必生大者熟
則小者必焦惟大小均熟斯為盡美言雖鄙
俚可通治道故居上以寬則下得盡情敷教
在寬則人樂趨善苟立法太峻民將不堪怨
懟作矣傳有之曰為政猶張琴瑟大絃急者

小絃絕昔子產相鄭有大略者不問其所短
有厚德者不非其小疵以之牧民因其所欲
而與之從其所好而勸之賞疑從重罰疑從
輕鄭國大治僑真得治國之道者矣今之為
治者民有小過則痛加捶楚部屋之下有欲
而不能自達者咸含悲以忍幾何而不至於
焦死也

人未遇時或有一技足以養身不必有全能也
蓋古之人有溫世醫卜寄跡傭作逃名畜牧

者率皆賤役甘心為之而不以耻彼豈好為人下哉私心竊計曰自食其力我既無求於人々亦無可奈我期於適用足矣假令志願太高希望太過賤者既不屑為必欲負天下之絕藝而不輕以售人及其困也無所得食欲徒手以取給於人々其有不厭我者乎昔朱平蕩學屠龍於支離益殫千金之產三年伎成而無所用其巧也伯樂教其憎者相千里馬教其愛者相駕馬以千里馬世不常有

其術難行駕馬在、有之其術易售易售足以資身彼善屠龍善相千里馬者無可表見不免有枵腹之歎矣然則欲養身者其可恃絕藝而輕賤役乎

或問於喻義子曰鬼神之說有諸曰有祭祀之典盍舉乎曰有其舉之何可廢也舉之將何如曰天子祭天地諸侯祭山川大夫祭宗廟士祭五祀庶人祀先祖人有定分不相越也天子以太牢諸侯以特大夫以牲士以魚炙

庶人設菜物有常品不相僭也外此祭非其
鬼則諂矣今之無端而妄舉淫祀動宰犧牡
以求媚於神者瀆亦甚矣神其有知其何以
享之

霜露人所恒有也今人不任採薪便疑為厲動
求師巫專事祈禱一切祀典不載之鬼罔不
致媚甚則傾囊倒橐寧死靡怨至如醫藥置
之弗問矣又有與人乖忤無可中傷即對神
詛呪以祈快心二事雖殊其為愚則一昔趙

飛燕讒婕妤妤好呪詛於成帝婕妤好曰鬼神有知不受邪佞之訴若其無知訴之何益理明詞辯深足感人范滂繫獄吏俾祭皋陶滂曰皋陶賢者知滂無罪將理之於帝如其無知祭之何益夫賢如皋陶且不當祭况無名之祀乎善乎孔子有曰獲罪於天無所禱也人能達此則知疾病之禱邪妄之呪均為無益知其無益而好為之亦愚之甚者也廉靜不特可以風世亦足以訓子孫昔蔡沈從

父元定謫道州父沒於官沈徒步護喪還有遺之金者謝卻之曰吾不忍以此累先人也曹脩古知興化軍卒賓佐賻錢五十萬季女泣白其母曰吾家素為廉吏奈何以是累吾先人拒不受夫蔡氏道學淵源父作子肖其為孝廉無疑脩古季女乃有遠識如是豈亦先人德化所致與今之為吏者身在多方歛錢伯起之風邈不可追矣况乎身歿能令子女不受賻金者幾何人哉噫世道良可慨夫

世俗見富貴則爭艷之見貧賤則共歎之豈惟
人情已亦有不能自安者昔蘇秦困不得志
欲從鄰子貸布一疋約價千金不與夫一布
約千金之償利甚厚矣而鄰子不與知千金
冰秦所有不知秦能有之於異時也俗眼觀
人奚獨一鄰子耶衛青少賤先母子奴畜之
有一鉗徒相青官至封侯青笑曰人奴之生
得無笞罵足耳安得封侯事乎塵埃中豈惟
言不人信誠有物色之者已亦不信其言矣

然則布衣起家致位通顯人所常有也觀人
者固不當輕貧賤而自立者又安可以貧賤
自阻哉

合浦舊俗容民採珠以易米時二千石貪穢多
採以自入珠忽徙去民無所得珠餓死者盈
路孟嘗氏為合浦太守至郡化行一年之間
去珠復還或云珠豈有知物哉避貪就廉吏
化之所感者深也年來東粵珠禁甚嚴匪直
官不得私民不得採凡竊採者一就捕獲無

論罪之重輕即榜掠椎楚慘酷異常未及成案而禁錮至死矣以故捕役之罔害尤甚於法苟知其人是有珠也必飾為販豎以誘人或或貪其重價出藏珠以貨之遂捕入官以為是竊珠者一入其罔富者破家貧者亡命銖連波及無一得脫縱有口莫可控訴矣虐政之害民如此珠曷不徙而去耶

近世法禁之嚴若煮鹽若關稅若鑄錢若造鈔若屠牛昭然具在令典有犯必罰然惟順人

情而從民便者為易行苟不便民禁者愈嚴
犯者愈衆雖日撻而求其遏絕不可得也故
屠牛肆禁竄小稍課皮張官司置之不問矣
鈔雖大久不行使禁設而未見有偽造者錢
雖日用然銅之價重而錢之利輕故私鑄而
犯禁者亦少關市間有漏稅亦以司權者重
累之若能寬恤一分則貨殖之利千百於稅
民何為而輕犯漏稅之禁也易犯者其惟鹽
禁乎鹽之為用民間之需食也竄急國課之

仰給也。竄重稍不戢，則利皆入於盜藪邊計，無從取辦矣。奈何鬻官鹽者入場有收買之費，堆積有守候之費，割沒有餘鹽之費，秤掣有盤驗之費，發賣有開引之費，計其費之所出，恒倍於常課。其價不得不重，價重則食官鹽者夫既難之矣。今取私鹽之利而較之，雖有其禁而無其費，其價自輕。價輕則興販者易於求售，食用者樂於便宜。况愚民之養生也，計利之心甚於守法，非有身家之念者安

肯舍其價之輕而食其價之重者乎是以寧
犯禁而不顧豈非法之不便於民者致之耶
噫令欲其行也不行曷如其已同國計者苟
能損其官益之費而輕其價則私販不禁而
自寧矣法制徒嚴何益哉

食取其飽雖無肥甘無害於口也衣取其溫雖
無錦綺無害於體也妻妾取其字育雖無美
麗無害於繼嗣也臧獲取其使令雖無僇巧
無害於服役也惟道義取其養心威儀取其

潤身苟精神之弗攝則內有邪思矩度之弗
莊則外有詖行一切施為粗俗面貌可憎雖
衣食饒裕寵御盈庭何補身心之萬一是亦
襟裾之馬牛爾

豚臭狀惡而味美以其味美也三吳之人遂忘
其惡而酷嗜之無厭苟製之弗精則足以殺
其軀豈狀惡者必大毒與故諺有之曰拚命
者食豚魚蘇東坡間嘗食而甘之亦曰直得
一死皆好其美而忘其惡者也里中有世胄

子二人素嗜其味竟相繼中毒而死延齡子聞而歎曰天之生物味美者固不少而美味之足以養生者亦不少奚獨一豚魚為可嗜哉夫既嗜之又不擇其製之精粗生熟直大嚼而厭飫之必充腹而後已遂至於傷生亦可哀也夫嗟乎傷生之事不一世有好利而專計貨殖之私者有好色而溺情衽席之愛者有好飲而沉湎麴蘖之場者有好訐而輕談曖昧之事者有好名而妄意侯王之業者

一不飭皆足以殺身其為豚魚之毒何限也
人當知所自惜矣

吳人有抱拙子者形容磊落意氣豪雄行多放
而不羈謀常踈而未就家人交責之意豁如
也出見其友橫金紆紫乘堅策肥一呼百喏
勢傾閭里乃相過而問曰吾與公同里閑出
入年齒相若也狀貌步武相似也知識學術
相謀也公富貴而予獨貧賤若此敢問何道
以致之友人曰燕市帝三之鄰而冠裳之會

也適燕者莫不有侈心際遇功名可立致吾
昔為田舍郎也與子無異今幸得策名仕籍
排金門入紫闥吾蓋得之於燕矣吳人聞其
然不詢其所以然一旦辭父母別妻子為適
燕之遊白晝入都門過冠紳之肆曰此可壯
吾之觀也過錦綺之肆曰此可華吾之躬也
過草烏之肆曰此可端吾之趨也一日而取
之無遺肆中人初億其為官長咸樂從而售
之越三日踵門而取其直匪直無償且知其

謬也大肆斥辱仍奪其物而去吳人失志徒
步而歸事聞閭里莫不鼓掌大笑以為異吳
人曰惡乎異今之冒冠裳而享富貴者非貨
賄而營求之即攘奪而陰得之既得之慮失
之又巧為回寵之計皆非道之所當得也者
吾非不知羞而不為也吾獨取之於白晝彼
不吾與吾即解而還之吾何歉於彼哉何笑
之有

憤世子曰今天下之妖大足以傷風俗壞治理

者其端有七而草木禽獸之妖不與焉若
譚心二簋致獻古之好會禮成則已今則具
必戒於數日之前客必延於三速之後若非
雀舌不烹於鼎鬻非珍羞不薦於豆列觥籌
陳水陸劇戲盈庭賓主相對而不相聞羅飭
滿筵肴核可啗而不可識甚至留連長夜膏
盡鐘鳴固知抵止此之謂宴會之妖上下有
章貴賤有等服制分定久矣今則負販而戴
緡紳之冠臧獲而納鑲雲之履男子腰繫女

裙婦人身披男服即家無擔石之儲者不斷週身之費簪犀玉衣綺縠一切骨角章布置之弗用矣此之謂服飾之妖古之學也出於一異端不得而淆之也今則禮樂不師周孔道德不法程朱談禪說偈啓口總是真空走納游緇尊禮擬於上客以頓悟為上乘目博洽為支離即王公大人咸崇釋教闡內典而六經束之高閣此之謂學術之妖詞尚體要格貴莊嚴文章自有定式也今則探索隱怪

斐不必於成章鈞摘艱深語不必於成句默
莊老之餘談品為絕學竊左史之口昭依為
正宗决裂經傳刪黜雅純師以此教士以此
學有終身傳習而不悟者此之謂文字之妖
古之君子厠儒林脩儒業詢々然謙已下人
惟務學之為急今則身冒衣冠心懷傲氣結
朋黨為腹心貌先達為朽棄言不循理行多
僂佻無事則羣居聚飲有事則比類譸張搆
巧言為旦評造呈詞為公舉較輓善類挾制

官司閭閻側目而不敢出息縉紳吞聲而不敢諂讓人方以為恥而不為彼且自為得意而甘心於澆薄焉此之謂儒行之妖民生未遂使司牧之張官置吏豈徒富貴之乎今則施巧法以獵下飾虛文以賈譽奸胥舞文置之不問而民有小過動加嚴刑大寇掠人縱之勿追而或有私爭必行峻罰踈縉紳為不畏強禦押徒隸為可托膂衷苞苴通而重罪得以賄免真情蔽而良善陷於無辜朝廷之

設官謂何而寄民社者乃如是耶此之謂政
事之妖民吾同胞物吾與也况誼相維而情
相屬者今則故舊等於秦越骨肉視為仇讐
氣失和平閭閻便成反目利差毫末手足遂
起閹牆方握袂而相怡卒噪面而詬詈朝然
諾而相許夕違背而敗盟利害得失之間雖
父子有不相顧者此之謂天常之妖七妖繁
興匪直一鄉一邑為然勢趨江河莫之砥柱
適中土而徹四海誠有舉世若狂者矣風俗

日頽治理日斁國家之災異至此已極雖有
賢聖復作變革實難彼草木禽獸之妖何足
以為異乎

抱甕子高卧雲丘忘情世態時直清秋氣爽啓
扉出遊躡松風之閣登二泉之亭呼童命汲
酌其泉而甘焉既濯纓而脩絮復解襟而危
坐徘徊瞻眺不忍舍去見四方之汲泉者輒
輶絡繹大者舟航小者盂盎踵相接肩相摩
盈器滿載殆無虛日乃作而歎曰泉之列也

人爭汲之若其垢也盈溝澮放潢潦莫之或
顧焉以是而知養盛者企慕必深脩潔者因
親必衆苟其穢德彰聞人咸棄之矣故汚染
之綺縠不如緼布之清白也破損之繡裳不
如毛褐之完具也敝壞之雲履不如草屨之
堅全也腐爛之膾炙不如茹糗之雅素也醯
酸之秬鬯不如村醪之澹薄也是以君子日
新其德惟恐為人所棄也

洛人有得延津之劍者懷而遊諸燕市懸標揭

直遍歷都門以號於人者三年咸疑其為贗也無一人睨而問焉矍焦唇枯囊傾裘敝淪落無聊不得已行乞而謀歸計道經養重先生之門見其身若有所挾而志若有所失也顧而問曰子何為而至是耶洛人曰懷寶劍而無所售是以如是其困極也先生曰懷寶者尚困於寶則無寶可懷者又將何如哉子殆寶失其所寶矣荆山之璞垂泣而獻者蒙刖足之刑夜光之珠以暗投人者遭按劍之

拒無他有寶而不知自重人皆輕賤之也吾
今為子增重之可乎洛人曰予非速於求售
也得一朗鑒者識吾之劍不埋歿劍之清光
吾願足矣雖窮約以終身無憾也於是先生
為之畫策舍洛人於家藏其劍於匣不輕以
示人凡當世知名之士孰不與先生交者乃
為之揚言曰吾家有劍客其所藏名劍夜朗
則光射牛斗風雨則聲動四壁真可水斷蛟
龍陸披兕虎而不染腥血者希世此是劍之

為寶也奈未有識之者終難於輕售介一時
喧傳都邑聲聞巨卿罔不造請而求快覩焉
求之不誠則不得一見也有尊賢上公者遂
盛衣冠備禮數捐千金以為壽始鬻其劍而
去夫劍一也輕於求售則三年而不獲一顧
重於珍藏則一朝而獲千金彼士有懷奇瑰
而不知自重乃數々求炫於世者則人之賤
之也固宜

人知害之為害矣而不知其始於利知禍之為

禍矣而不知其召於福故善畜歲者有刼奪之憂耽逸樂者致死亾之患夫利為害之媒福為福之基惟不求利者自無其害不求福者自無其禍詩曰不枝不求何用不臧

鵲鵲在林所栖不過一枝與凡鳥等耳及其奮青霄而展六翮也須臾駕海凌空燕雀自知其翮之不若遠矣騏驥伏櫪所食不過芻粟與常馬同耳及其奔千里而騁逸足也須臾過都越國駑駘自知其足之不逮遠矣賢士

在野縵袍不能蔽體藜藿不能適口何異於
世俗之士及其出而輔治則惠養黎元奠安
宗社凡其所優為者皆固寵負勢者所望而
震焉者也世俗之士何能彷彿其萬一哉

或問於妙德先生曰貴可恃乎曰不可使貴而
可恃也則王侯無失爵而賤者終身奴隸矣
富可恃乎曰不可使富而可恃也則糜麗常
相仍而貧者終身枵腹矣智可恃乎曰不可
使智而可恃也則機械無巧患而愚者終身

可固矣辯可恃乎曰不可使辯而可恃也則
便佞不取憎而訥者終身無告矣勇可恃乎
曰不可使勇而可恃也則強梁無橫災而弱
者終身不振矣故貴莫尊於商君而不免車
裂之禍富莫饒於季倫而不免滅族之慘智
莫察於晁錯而不免反激之危辯莫捷於蘇
秦而不免鉗口之辱勇莫強於卞莊而不免
戰鬪之死五者履盛之時勢凌天下人何敢
出一息及其禍之至於身也曾狐鼠之不若

勢何可恃乎是以君子不恃吾有可畏之勢
而恃吾有可仰之德、脩於己則參天兩地
不俟爵而貴焉粹面盜背不俟財而富焉虛
中洞照不俟察而智焉德音孔昭不俟給而
辯焉理氣常伸不俟力而勇焉此其所務者
大故其可恃者久詩曰自求伊祐

烈火之薰灸何如秋陽之暴江河之灌溉何如
甘雨之滋推食、人非不飽也何如稼穡之
餘粒解衣、人非不溫也何如桑麻之餘被

法制禁人非不畏也何如禮義之餘化蓋衣食既足賚予可無施矣教化既興法禁可無設矣杠梁既成乘輿可無濟矣信義既孚盟會可無脩矣黎庶既安水旱盜賊不為害矣風雨既調景星慶雲不為瑞矣鳥獸咸若鳳凰麒麟不為祥矣致太平者無歡娛之惠享帝力者詠何有之歌噫王道感民之深與功利之要譽於人也誠天淵哉

黃白之術世誠有之然有貪罔橫富而好為此

者其後必有橫禍昔蘇子瞻從事扶風時嘗
入開元寺觀畫古壁有二老僧邀過院曰貧
道有一方能以朱砂化黃金當傳人而患無
可傳者知公可傳故欲一見子瞻曰吾不好
此術雖得之將不能為僧曰此方知而不可
為公若不為正當傳矣是時陳希亮守扶風
常於此僧求方而僧不與子瞻曰陳卿求而
不與吾不求而得何也僧曰貧道畏其得方
不能不為爾昔嘗以方授人有為之即死者

有遭喪者有失官者故不敢輕以授人願授
公必不肖輕作如陳卿輩慎勿傳也子瞻
許諾後遇陳卿語及此僧遽應之曰近得其
方矣因具道僧不欲輕傳之意陳固請不已
與之試其方良驗子瞻悔曰某不惜此方惜
負此僧耳公慎為之陳姑應曰諾未幾坐監
敗子瞻疑其以金故深自悔恨後謫居黃州
陳子慥在黃子瞻問曰少卿昔竟為此法否
慥曰吾父既失官至洛無以買宅遂大作此

然竟病指癰而沒乃知僧言誠不妄也然則
開元寺僧不欲輕傳之意蓋深懲於授人而
為之得禍者子瞻乃傳非其人哉故范文正
公得同舍之方而復還其子匪直懼禍而不
為亦不欲邀非望之福也抑又賢於子瞻矣
廬江有一監司謝事懸車日延方士煉丹敬信
之如鍾呂復生其夫人頗知書史嘗戲問之
曰丹成何以謝方士監司曰渠自能點化不
圖謝夫人曰渠不圖謝何故以丹法傳君監

司曰渠謂我有僊風道骨故傳之夫人曰君
垂涎點化志在貪財妾未聞蓬萊三島乃有
貪財神僊話間其婿來謁夫人曰金丹若成
當傳之婿乎監司有難色夫人曰君得金丹
不宥傳婿君非方士之婿渠胡宥獨傳之君
耶監司終不悟居無何方士化為烏有先生
而丹鼎從之夫人又戲之曰夜來方士赴蟠
桃之會未知騎黃鶴去耶騎赤鯉去耶監司
默然長吁而已嗟乎方士誘人之術人所易

曉即婦人之智亦有不可欺者况士君子讀
聖賢書稍知理義乃反為人所愚弄良可恠
也蓋貪夫妄念惟圖徇利故巧言一入即為
箠惑至有敗家蕩產而不恤者奚獨一監司
哉予見世人往往為方士所惑故詳記此以
為貪得者之戒

觀秦華者巍然峙矣就其塊質言之土石雜沓
草木叢生不見其美也望於數十里之外朝
煙暮靄吐嵐納雲螺髻疊青蛾眉橫翠令人

景仰終日而無厭焉山不以遠為美乎觀江河者沛然流矣方其注納之時溝渠穢涖潢潦汙濁何所不容至於汪洋千頃涵天浴日震乾擊坤風動成文波澄拖練真有浩蕩莫知其涯涘者水不以大為繫乎嗚呼莫高匪山美以遠著莫深匪水繫以大成然則君子之脩身而輔世也可遠觀而不可褻就可大受而不可小知何以異此果實之有蟲者方其花時遇風塵土入之而為

胎故蟲生焉穀粟之有粃者其花時遇風而
失其花無以為胎故粃成焉果之蝕穀之粃
皆有所自然則人之生也方為童子時其性
不甚相遠至於成人終則大異得無有所以
風之者乎嗟乎人生為外物所汨鮮有不喪
厥性者即果之蝕穀之粃者也聖人與人無
異性苟人性而無外物以汨之何不可以作
聖

貌飾情文飾質其中未必實也故君子敦情以

去貌崇質以去文惡其虛之矣實爾夫緣貌以求情、必薄緣文以求質、必衰何以論之王嬙之色不飾以鉛粉也而其貌自殊雲錦之章不飾以五采也而其文自異實美之在中者自無所用其飾待飾而後美者必非美之至也是以家庭之間父子兄弟之相接非無貌也情勝則貌為情所奪矣非無文也質勝則文為質所掩矣苟區々於文貌之脩飾吾知實意微而情質寡家道其衰乎

避囂子好習靜恒山居却掃一室焚香默坐流
俗變態一無所嬰其慮焉混世生過而問曰
靜功聖學之要先生之習靜也專矣入山求
靜夫乃靜以迹而非靜以心乎避囂子曰於
善哉爾之問也靜不必在山予之在山有耻
於靜者多矣今夫目司視、可無擇於色乎
無擇於色則惡色至矣惡惡色不如寡視耳
司聽、可無擇於聲乎無擇於聲則惡聲至
矣惡惡聲不如寡聽口司言、可無擇於談

乎無擇於談則惡談至矣惡惡談不如寡言
動司舉、可無擇於事乎無擇於事則惡事
至矣惡惡事不如寡舉交司接、可無擇於
人乎無擇於人則惡人至矣惡惡人不如寡
接五者之為害不謀而自合五害之入人不
察而日深非有以遠之則無以却之却之在
於習靜習靜者無間於在家在山心有主自
能不動矣但在家者欲絕五害而五害常誘
於前在山者不拒五害而五害自遠盖寡視

則惡色不至於目、自無妄視矣、寘聽則惡聲不至於耳、自無妄聽矣、寘言則惡談不出於口、自無妄言矣、寘舉則惡事不見於動、自無妄舉矣、寘接則惡人不近於交、自無妄接矣、五害既遠、則心益清、心清則不求靜而自無不靜焉、故湯之不通聲色、九經之去讒遠色、老聃之不見可欲、使心不亂、先後著符合、然孰非遠害而全靜乎、夫曰不通曰去遠、曰不見、皆在山之意也、然則予之在

山其有助於習靜也不既多乎哉混世生慙
然曰聞先生之教乃知遠置所以近靜也世
人之不能靜者其為流俗所混過半矣
和光氏豢豕牲色雜黑而性懶爪牙不足以捕
鼠好嗜魚肉而已一夕育豕豕三其二與已
相類其一則純白雄健有耽、虎視之狀惡
其弗類於已也齧而殺之決裂其腸胃靡盡
其軀而後止其類於已者則字之惟恐其或
傷也天順子聞而歎曰甚哉豕之不仁也目

眩於外而情奪於中即已所自育猶然戕害
之况非其種乎世之人同於已者愛之異於
已者憎之非直衣冠色貌已爾雖其平居握
手相怡盟質相許情文煦々相扶自為陳雷
不相讓也乃卒然臨利害當事機脫或杯酒
之不相協臭味之不相投謀為之相越意見
之相左言詞之不相下有一於此即疑其與
已不相類也從而詆排之擠陷之墜之并而
下之石凡可加之罪而置之死者苟足以洩

其憎靡所不至矣噫有不為和光氏之狸也者幾何人哉

邾鄆民以正旦獻鳩於簡子簡子大悅厚賞之客問其故簡子曰正旦放生示有恩也客曰民知君之欲放而競捕之死傷必多君如欲生之不若禁民勿捕、而放之恩過不相補矣簡子曰然遂下勿捕之令喻義子曰近世愚民家好焚脩動羅僧道於庭持齋誦經累數日不散名之曰預脩功果將畢必多方買

捕鳥雀為放生之舉且誇其為恩自己出以
祈福報閭閻遂相傳為盛事心慕而樂效
之以故凡有脩齋者無一家不放生亦無一
家不費捕雀之錢然放而生者無幾捕而死
者甚衆此與竊人之財而施捨佛金者何異
噫如此焚脩非徒無益而有害之愚亦甚矣
人有以作事謀我者必據理以道之有以脩怨
聞我者必善言以解之彼縱不能從我、實
無忤於人也有以非義干我者必曲喻以拒

之有以邪利陷我者必宛辭以卻之彼將有以誘我、實無媿於心也嗟々出好興我惟言是召義利取舍始於一念、之不臧言之無經匪直喪已且以誤人起釁召禍將莫知其所終矣可不慎與

唐新昌令夏侯彪初下車問里正鷄子一錢幾顆曰三顆乃遺十千錢令買三萬顆乃謂曰吾未要暫令鷄母抱之遂成三萬頭鷄數月長成令便與賣却一鷄三十文半年之間收

錢九十萬又問竹笋一錢幾莖曰五莖又取
十千錢付之買笋五萬莖又謂曰吾未要且
在林中養之至秋成竹一莖賣十錢遂收錢
五十萬其貪猥不道類如此相傳以為笑談
曰世必無此官也自近世觀之縱有此官奚
足深恠蓋錢至十千猶費本也時至數月猶
緩征也若令之為吏者不費一錢不須時日
嚴刑之下何求不遂或九十萬或五十萬唾
手可得然則如彪者猶賢乎已

人之享福者恒饒裕家饒裕則驕奢易生驕奢
生則動棄理義棄理義則行多邪僻行邪僻
則身有橫害有橫害則年必夭札以邪僻之
行而招夭札之患此大禍也禍而本於有福
故曰福兮禍所伏人之被禍者恒恐懼恐懼
多則思慮熟思慮熟則事理得事理得則行
端莊行端莊則無災害無災害則身必康樂
以端莊之行而享康樂之休此大福也福而
本於有禍故曰禍兮福所倚禍福之機君子

慎之

天之可徵者惟人々之可恃者惟天天不能視
聽寄人之耳目以為聰明人受天地之氣以
生至理之在人心者自不能違天而獨異自
後世有天定勝人人定勝天之說始岐天人
而二之豈知天人一理寧有未定時乎天有
此理在天下曰公道人有此理在衆口曰公
論公道或以一二人而壞而天下之大終不
可盡壞公論或以一二人而廢而衆口之多

終不可盡廢徐而觀之天與人何嘗不定人
何嘗勝天天何嘗勝人天人何嘗交相勝耶
善察人心者天意可推矣

古人於日月薄蝕必恐懼奔走伐鼓而救護之
豈不知氣數在天非伐鼓之所能移而必為
此者謹天戒爾猶之旱暵為災必告廟行香
禁屠而祈禱之豈不知災害流行非禁屠可
回天意而必為此者憂民隱爾然則聖賢之
用心在平時不在一時在萬事不在一事故

其敬天也無事而不順天之心亦無時而不
順天之心其勤民也無事而不體民之情亦
無時而不體民之情是以雖有天灾而不為
害以其脩之者素也若後世之伐鼓救護禁
屠祈禱徒事虛文掩人耳目者欺天罔人之
甚聖賢豈為之哉

人有恒言酒能亂性予意為市井高陽之徒而
幾近見人一被酒則柔者剛弱者強訥者辯
樸者狂端嚴者放逸沉静者發揚言詞失其

安定步武垂其繩尺衣冠違其常度舉動戾
其準則甚至誕慢縱恣悖逆無道微言好聞
傷害族類故舊不相和親戚不相識觴斯濫
矣古人諄々以德將無醉沉酒麴藥為戒者
有味乎其言之也由今觀之能亂人性者奚
獨一旨酒哉冒爵者以貴凌人多財者以富
驕人能文者以學傲人至有片長曲技遂自
誇詡似為舉世無雙不勝其悻々之狀抑又
下矣其為亂性者何限也人當知所慎矣

人不為惡未有善稱為善一不絕惡聲隨之故
天有陰德星若見若不見慧孛一出即光芒
亘天是善難見而惡易彰也諺云終身為善
不是一旦為惡有餘世人挾隱慝而謂人莫
之覩者亦愚矣哉

古之聖賢不出戶庭而能周知天下之民隱豈
目能視乎千里之前耳能聽乎千里之外抑
一一以事誅咨而索之者乎惟以已之情察
人之情與我不相遠也推而廣之若規矩之

合方圓繩墨之當平直自發無不中矣故吾
孝吾親則知天下之欲養其老也吾愛吾子
則知天下之欲慈其幼也吾惡其飢寒則知
天下之欲衣食也吾厭其勞苦則知天下之
欲安佚也吾計其缺乏則知天下之欲富足
也凡有欲而不能自達者吾能一一而善體
恤之教以孝慈勸以耕作課其蠶桑時其役
使而節其經費不必家賜而人益之而治平
之效不下几席間矣術豈多乎哉君子之道

忠恕而已矣

人藏其心不易識也觀人者不知其德觀其容
不知其積觀其用有諸內者必形諸外言實
之不能藏也傳曰良玉度尺十仞之土不能
掩其光良珠度寸百仞之水不能掩其瑩苟
有溫良在中眉睫間著之矣瑕疵在中則眉
睫不能匿之詩曰鼓鐘於宮聲聞於外
嘗謂士人不當好名特恐崇尚浮名者為實德
之累爾上之求人與君子觀人則不當以好

名為嫌也人誠好名則必畏義畏義則必無
邪行故奸直諫者必無諂諛之詞好任事者
必無畏縮之弊好廉潔者必無貪得之污好
恬退者必無干謁之請好儉素者必無奢侈
之習好推挽者必無排擠之謀好謙讓者必
無較輟之暴好施予者必無攘奪之克好敦
睦者必無圯族之忤好寬厚者必無刻薄之
私人臣好名必不為不忠人子好名必不為
不孝處士好名必不為不義究其諂極雖未

必盡合於中道而即其所好必非流俗者所能為也何近世猷聞公議者每以直言為沽名而委靡不振之士一遇懷奇抱瑰者建不朽之事見其為驚世駭俗而遂以好名目之斯亦過矣

宋制沙門島配囚舊有定額過額則取一人投海中及馬默知登州建言朝廷既貸其生復投海中非好生本意今後溢額乞選年深自至配所不作過人移登州神宗深然之遂著

為例馬初無嗣因此夢天使稱上帝命賜以
男女陰德之報理或然也近世豪橫之家滅
獲有犯不問過之重輕痛加椎楚有因而斃
於杖者有棄而投之河者有推而墜之井者
有勒而置之縊者其視投海之慘抑又過矣
倘果陰報安得使之有後耶

昔人記王彥伯自言醫道行時列四五爐煮藥
於庭老幼塞門彥伯指曰熱者飲此寒者飲
此風者飲此既飲而去翼日各持金帛來酬

無不效者及後時退身自多病察脉按方不能愈也令之挾策求名好謀圖利者得時則唾手成功失時則白首不遇大都與醫術無異也豈獨一產伯哉

吳越人同駕舟過險灘則相助為力稍不應手則相詬如仇讐及舟之下安流而泊也則惓然相得如初士大夫任當世之務誠如操舟者然事至不妨商確異議、定則當畫一而行若各執已見以求勝覆敗隨之矣國家奚

賴焉昔韓范富諸公上殿相爭如虎下殿不失和氣真可謂同心共濟得操舟之道者矣倦遊子辭榮名而東歸耽翫讀以為樂遇接罹則晤語終日視軒冕則頻蹙感若僦一立一壑超然有物外之意有間二三友人咸進言曰登崇躡要者閭閻之休光也策勲立名者丈夫之能事也無其基而有其志者尚希進而妄干矧階相叅級相邇達可一閭者乎知周萬變行不執方先生之才則通矣視聰明達

步趨便捷先生之體則強矣秉綱持紀為憲
一方先生之秩去崇要不遠矣為山九仞功
止一簣先生何憚而不出以收垂成之效意
者其有遺慮乎倦遊子驟聞其說初甚牴牾
既而謀諸宗黨宗黨之言猶夫爾也歸而謀
諸妻子妻子之言猶夫爾也懷疑不決乃造
知幾公而卜焉公曰先生何卜也倦遊子曰
靜極者思動畜極者思通否極者思泰日往
則月來寒往則暑來屈伸代謝天之道也吾

既仕而進、而退、而處矣有勸之復出者
心竊自疑願有請焉知幾公曰先生既明乎
天之道則可推乎人之事矣何以卜為倦遊
子曰僕未竟其去也願公卒教之公曰若著
與龜皆朽物也而能通乎鬼神之情狀者惟
虛故靈爾人為萬物之靈虛其中不滯以成
心則出處進退咸可自聽而何必聽於物乎
今夫勢太盛者必衰福太過者必咎樂太極
者必怨今之敝屣昔之珠履也今之頽垣昔

之雕墻也今之瘠姥昔之歌姬也向為供御
今為棄捐朝為芻狗暮為蘓爨成功者退將
來者進皆物理盈虛之數也善察盈虛者留
有餘補不足自可引久而勿替故設賓筵者
珍羞絡繹觥籌交錯甚盛舉矣然獻畢則禮
成曲終則樂睽乘其意之勤劬而脩聚脩散
賓不盡主之情主不失賓之禮相敬之隆者
斯兩相得苟至燈殘漏盡肴敗酒漓主人厭
倦而賓方求退不既晚乎先生達此何必發

策而枚卜哉倦遊子聞言若有所得乃歌曰
山可樵兮水可釣田可耕兮子可教五經可
汎兮扁舟可棹吾安吾命兮吾樂吾道

宋承山畫永徧嘗載其友人鄺子元由翰林補
外十年餘不得賜還侘傺無聊遂成心疾每
疾作輒昏憤如夢或發譫語有時不作無異
平時或曰真空寺有老僧不用符藥能治心
疾子元往叩之老僧曰相公貴恙起於煩惱
生於妄想夫妄想之來其幾有三或追憶數

十年前榮辱恩讐悲歡離合及種種閒情此是過去妄想也或事到眼前可以順應却乃畏首畏尾三番四復猶豫不決此是見在妄想也或期望日後富貴榮華皆如其願或期望功成名遂告老歸田或期望子孫登庸以繼書香與夫一切不可必成不可必得之事此是未來妄想也三者妄想忽然而生忽然而滅禪家謂之幻心能昭見其妄而斬斷念頭禪家謂之覺心故曰不患念起惟患覺遲

此心若同太虛煩惱何處安脚又曰相公貴
恙亦原於水火不交何以故凡溺愛冶容而
作色荒禪家謂之外感之欲夜深枕上思得
冶容或成宵寐之變禪家謂之內生之欲二
者之欲綢繆染著皆耗元精若能離之則腎
水自然滋生可以上交於心至若思索文字
忘其寢食禪家謂之理障經綸職業不惜勞
勸苦禪家謂之事障二者之障雖非人欲亦乖
性灵若能遣之則心火不至上炎可以下降

于賢故曰塵不相緣根無所偶返流全一六
用不行又曰苦海無邊回頭是岸子元如其
言獨處一室掃空萬緣靜坐月餘心疾如失
若老僧之言能破世愚真可謂對病之藥也
已今人溺情富貴恣意色欲未得而輾轉思
求既得而貪戀不舍種々妄想種々煩惱忽
生忽滅無一人不受子元之病少不至于喪
心發狂者亦幸爾安得老僧一一為之療治
也噫